



Komunikadu Imprensa
30 Dezembru 2023

JSMP lansa rezultadu survei finál kona-ba Persepsaun no Satisfasaun hosi Parte Sira ho Atendimentu Justisa Iha Kazu VBJ iha TL

Iha 19 Dezembru 2024, JSMP lansa rezultadu survei kona-ba “Persepsaun no Satisfasaun hosi parte sira ho Atendimentu Justisa iha Kazu Violénsia Bazeia Ba Jéneru (VBJ) iha Timor-Leste.”

Objetivu hosi survei ne’e mak atu kompriende atendimentu parte fornese dór sira ba kazu VBJ, esperiénsia, perspetiva no nesesidade sira hosi utilizadór sira (parte sira) ne’ebé uza sistema justisa iha kazu VBJ no avalia sira-nia satisfasaun ho atendimentu justisa, inkui tribunál sira, ofisiál justisa no juis sira, Gabinete Prokuradór Jerál, Defensória Públika, Advogadu Privadu, no polísia.

Alende ne’e, atu halo mós komparasaun hosi rezultadu survei ida ne’e ho survei baze antes (Estudu kona-ba Persepsaun no Satisfasaun hosi Parte, Representante, Juis no Ofisiál Tribunál sira ho Setór Justisa no Atendimentu Justisa iha kazu VBJ iha 2023) no avalia progresu hosi sistema justisa nia resposta ba kazu VBJ no identifika kualkér problema ka dezafiu sira iha sistema justisa nia resposta ba kazu VBJ. Inklui fó rekomendasaun sira no identifika lisaun sira ne’ebé aprende ona hodi informa kona-ba dezvoltamentu iha futuru no hadi’ak kualidade hosi sistema justisa nia serbisu sira no tribunál nia prosesu sira hodi fó justisa ba vítima sira ne’ebé hetan VBJ, ho nune’e prosesu sira bele sai efetivu, efikás no justu liután.

Iha introdusaun ba lansamentu ne’e, Sra. Ana Paula Marçal, Diretora Ezekutiva JSMP haktuir katak JSMP halo peskiza ida ne’e atu haree klean kona-ba satisfasaun hosi parte sira ne’ebé lori ona prosesu ba tribunál no oinsa sistema justisa nia resposta ka atendimentu ba parte sira liuliu iha kazu VBJ. Tanba asesu ba justisa nu’udar direitu fundamental ema nian ne’ebé garantia iha Konstituisaun RDTL, nune’e, presiza atensaun hosi parte hotu-hotu.

“Lansamentu ohin nian nu’udar lansamentu ba iha survei ne’ebé JSMP halo iha tinan ida ne’e ho titulu “Persepsaun no Satisfasaun hosi parte sira ho Atendimentu Justisa iha Kazu Violénsia Bazeia Ba Jéneru iha Timor-Leste. Survei ida ne’e mós nu’udar survei dala ikus nian ho objetivu atu hatene klean satisfasaun ema sira ne’ebé uza ona sistema justisa formál, oinsa tratamentu ne’ebé autór tribunál ka judisiál sira fornese. Nune’e peskiza ida ne’e la’os atu buka frakeza hosi instituisaun judisiál sira maibé atu haree difikuldade sira no dezafiu sira ne’ebé iha hodi hadi’ak liután iha futuru, tanba asesu ba justisa nu’udar direitu umanu ka direitu fundamental ema nian ne’ebé garantidu iha

ita nia Konstituisaun,” dehan Sra. Ana Paula Marçal, Diretora Ezekutiva JSMP.”

Sra. Ana Paula hatutan katak asesu ba justisa ne'ebé justu nu'udar responsavel ema hotu nian tanba ne'e mai ita hamutuk ajuda ita nia setór justisa nune'e sira bele fornese justisa ida ne'ebé justu ba parte sira. Ita hamutuk hamaran vítima sira nia matan-been, liuhosi ita sai ibun, tilun, liman no ain ba ita nia maluk sira liuliu sira ne'ebé laiha lian ba iha justisa.

Survei ida ne'e, JSMP halo entrevista ba iha vítima 49, arguidu 53 no testemuña na'in 8 no entrevista ne'e halo iha tribunál judisiál primeira instánsia haat (4), tribunál movel, Prizaun Bekora no Prizaun Gleno, Respondente sira-nia uma, JSMP nia eskritóriu, Ministériu Públiku nia eskritóriu no Uma-Mahon sira. Liuhosi survei ne'e, atu enkoraza no rekomenda ba instituisaun relevante sira hanesan Ministériu Justisa, Tribunál, Juis, Ofisiál Tribunál, Ministériu Públiku, Defensória Públika, Advogadu Privadu, Polísia no forneseedor assisténsia legál tenke kontinua atu adota sasukat pozitivu sira hodi garante katak sistema judisiál tomak bele responde efetivamente ba kazu VBJ no adekuadamente prienxe sobrevivente, labarik no ema ho defisiénsia sira-nia nesesidade spesífika ne'ebé envolvidu iha kazu VBJ no hodi hadi'ak sistema tribunál nia efisiénsia hodi administra justisa. Atu halo ida-ne'e, entidade relevante sira tenke foti asaun urjente tuir rekomendasauun spesífika sira ne'ebé mensiona ba entidade ida-idak iha relatóriu ne'e.

Iha abertura, Meritísima Juisa Konsellera Tribunál Rekursu, Dra. Maria Natercia Gusmão ne'ebé representa Prezidente Tribunál Rekursu, hato'o ninia saudasoes no konsidera serbisu sira JSMP nian importante tebes hodi asegura direitu umanu ema nian ba justisa inklui liuhosi JSMP nia monitorizasaun no avaliasaun sira bele fornese rekomendasauun sira hodi hadi'ak liután sira nia serbisu ba iha administra justisa ho justu no transparente.

“Hau sauda ho ita-boot sira ba iha eventu lansamentu relatóriu kona-ba persepsaun no satisfasaun parte sira ba atendimentu justisa kona-ba violénsia bazeia ba jéneru iha Timor-Leste”. Hau hatene katak JSMP hahú iha tempu ne'ebé kleur ona, tempu hanesan tribunál sira funsiona iha 2000, no JSMP hahú eziste iha tinan 2001. JSMP nia dedikasaun liuliu atu promove transferénsia, responsabilidade no mós fortesimentu iha ita nia sistema justisa iha ita nia rain. Serbisu sira ne'e liuliu atu asegura direitu umanu, direitu fundamentais ema hotu nian no mós ba Estadu direitu ida ne'e atu bele hetan respeito no mós ita bele proteje, dehan Juisa Konsellera, Dra. Maria Natercia Gusmão.

Juisa Konsellera ne'e hatutan katak hosi monitorizasaun JSMP nian iha tribunál sira ka ba serbisu tribunál sira nian hodi halo avaliasaun kona-ba funsionamentu tribunál sira nian liuliu atu garante katak prosesu judisiál sira tenke kondús ho forma ida justa, transparente no mós eficiente. Tanba ita

ko'alia kona-ba transparénsia, eficiente, ema hotu-hotu konvokadu ona ba aktu ida ne'e, maibé bainhira sira haruka fila no halo adiamentu ne'e mak hanesan fatores ida, ladun efesiénsia. JSMP durante ne'e halo advokasia no reforma lei sira. Iha relatóriu sira ne'ebé antes ne'e prodús iha rekomendasoins lubuk ida atu mellora di'ak liután sistema justisa nomós promove mudansa lejislativa balun atu fortalese instituisaun iha justisa nian.

Entretantu depoisde rona JSMP nia sumáriu badak ba survei ne'e, Juisa Konsellera ne'e hateten katak JSMP mós halo sensibilizasaun liuhosi edukasaun publiku, defensória públiku mós hateten katak sei informa ba públiku kona-ba direitu ema nian no mós funsionamentu kona-ba sistema justisa nian. Alende ne'e VPU mós halo sensibilizasaun kona-ba kestaun oinsa hasoru violasaun kona-ba direitu ema nian no liuliu hasoru violénsia bazeia ba jéneru, VPU mós fó apoiu ba iha sistema tomak liuliu atu garante sistema justisa ne'ebé bele asesivel katak ema hotu-hotu bele hetan asesu inkluzivu no efikas partikularmente liuliu grupu sira ne'ebé mais vulneravel ne'ebé prezisa tebes tulun, hanesan ohin mensiona katak monitorizasaun ba iha tribunál sira ne'e esensiál tebes, JSMP nia papél esensiál tebes liuliu atu haree kona-ba VBJ.

Dra. Natercia hatutan tan katak relatóriu ne'ebé JSMP prodús hanesan refleksu ida ba iha komprimisu JSMP nian atu promove justisa no direitu umanu iha Timor- Leste, VBJ hanesan dezafiu significativu ida iha ita nia rai, problema la'os afeita de'it vítima maibé afeita mós desenvolvimentu judisiál. Dadus resente hatudu katak fetu no labarik barak kontinua vulneravel iha violénsia física, psikolójia no seksuais, tanba ida ne'e resposta ba sistema justisa ida krusiál tebes liuliu atu proteze vítima sira no mós atu fó kastigu ba iha agresor sira liuliu atu prevene krime sira ne'e akontese tan iha futuro, tanba ne'e monitorizasaun hosi JSMP revela no pertenente tebes tanba importante tebes haree serbisu tribunál nian liuliu ministériu públiku, juis, defensória públiku. Iha parte ida ne'e, Dra. ne'e hateten katak funadamental mós ita tenke rekoñese esforsu no dedikasaun hosi ita nia juis, MP no defensória públiku.

Iha parte seluk, representante Defensoria Públiku Jerál, Defensora Dra. Marcia Sarmiento hateten katak Defensoria Públiku sempre foti pozisaun pozitivu ba iha JSMP nia deskobrimentu sira tanba deskobrimentu sira bazeia ba realidade. Alende ne'e, defensora ne'e hato'o parabens ba JSMP ba lansamentu relatóriu survei no mós hato'o agradesimentu ba JSMP tanba envolve ona defensor sira iha JSMP nia atividade hasa'e konsiénsia públiku liuhosi desiminasau informasaun ba iha comunidade.

“Defensoria Públiku haree katak bazeia ba relatóriu sira ne'ebé iha no sempre foti pozisaun ne'ebé pozitivu no JSMP fó sai deskobrimentu sira tuir realidade ne'ebé akontese duni. Saida mak sei menus iha ita nia atendentu serbisu sira ne'e hodi ita bele konsidera no tau atensaun iha futuro. Agradesese ba JSMP durante ne'e liuhosi meu balun envolve mós defensoria públiku halo dezaminasaun informasaun to'o iha comunidade sira hodi nune'e comunidade

sira bele hatene sira nia direitu no bainhira iha kazu ruma sira hatene no iha ona koñesimentu oinsa atu prosesa sira nia kazu ba iha justisa formál. Atendimentu vítima sira ne'e, la'os instituisaun ida deit maibé ba instituisaun hotu-hotu ninia responsabilidade. Nune'e, lori Defensória Públiku nia naran fó parabens ba JSMP ba relatóriu ne'ebé lansa ohin loron no susesu nafatin JSMP," dehan Defensora Dra. Marcia Sarmento.

JSMP hakarak hato'o agradesimentu ba UNDP liuhosi Koica ne'ebé apoiu ona JSMP ba peskiza ida ne'e inklui peskiza dahuluk iha tinan kotuk espera katak kooperasaun serbisu sira bele kontinua iha futuru. JSMP mós hakarak hato'o agradesimentu ba arguidu, kondenadu, vítima/ofendida no testemuña sira tanba envolve ona iha peskiza ida ne'e liuhosi fornese informasaun sira util ba ekipa JSMP.

Lansamentu ne'e partisipa hosi representante Prezidente Tribunál Rekursu, Meritísima Juisa Konsellera Dra. Maria Natercia Gusmão, representante Defensoria Publiku Jerál Dra. Marcia Sarmento no mós defensória públiku seluk, Advogado Privadu, parseiru sira hosi Governu (MJ, no MSSJ), Doador sira, parseiru sosiedade sivíl, Komandante Polísia Munisípiu Dili no Estudante hosi Universitáriu sira.

Atu hetan informasaun kompletu favor kontaktu:

Ana Paula Marçal
Diretora Ezekutiva JSMP
Email: ana@jsmp.tl
Telefóne: 332388377040735
Website: <http://jsmp.tl>